

國朝駢體正宗續編

國朝駢體正宗續編卷四目錄

懷遠縣重修塗山大禹廟碑

綠玉詞序

仙山塵夢圖序

陸祁生宣南話舊圖序

游菊江亭記

再答董方立書

江西廣信府知府贈振威將軍安徽巡撫康公神道

碑

甘肅鞏昌府知府護理鞏秦階道胡息齋先生別傳

祭周筠雲文

目金
一
文
謁紫虛元君文

扶風縣唐楊珣碑跋

書幾社考後

書王義士虞山柳枝詞後

印古琴白下聯吟集序

答劉孟眉啟

海紅華館文鈔序

舒藝室詩序

太華峯頭作重九圖序

瞿忠宣公臨桂郡侯行軍章記

國朝駢體正宗續編卷四目錄

國朝駢體正宗續編卷四

嘉興張鳴珂公束輯

懷遠縣重修塗山大禹廟碑

方履錢

夫乾曜奠化庶彙宅躬榛莽兆蒙亭毒嬗起原自驥首靈
若受圖而秉元龍顙神昆承華而纂辟尊盧赫胥之記譙
明祝誦之躔固已權輿帝象網緼泰壹金鏡朗乎六合玉
券書其十華而運徵蒼昊事遠黎黔毖矣荒屯鮮可稽尙
降暨五德紹駕九招籥和迪迹者上聰宰治者迭聖析綴
葉而耀翬裳準結繩而鏤螽簡創因開昧茂於黃炎踵麗
鏤文訖於陶媯世紘以恢清濁以洽然而陽九遘災元二
履厄平壤震汨崇陵懷襄洪流之堙放勳所不能濟巢窟

之眾虞韶所不克諧亶惟夏王肇闢昏墊美哉禹功明德遠矣粵夫有莘啟哲高密誕祥星精貫昴木之宮石紐叶神珠之瑞執威樞之柄玉斗入胷戴經極之珍鉤鈐在首錫嘉名於文命奉溟漠於元符觀奇表之所鍾固非常之聖也時則息壤用廢滔天未窮九載旣勤弗父其績四嶽僉咨乃圯其族白馬傳刑唐廷所以速明效黃熊避策羽淵所以顯幽祇禹乃傷前勲之不彰懷厥考之成勲於是應明徵續世業升石夷理寰薄苦身焦思胼爪胝趾酷醜懊悞悞勞繁慮巾挂於道履涉於淵跨巨浸則鼃鼃以爲梁踰翠岑則明虬以爲御行迨徧乎濛汜惟不踐於羽山而後丕烈綏肆遺蠱弭忘使方命之臣配郊於顓頊汨陳

之罪奏德於皇天養至渥也報至純也故天下咸知大禹之孝以爲逆瀧之奔非真宰不靖彝倫之敘非探賾不獲達其變乃能窺天地之藏致其精乃能究通塞之界於是東觀濁河而巨靈獻綠字之箴西至肥水而長人授黑玉之誥乃復案厯中經營求宛委解於陽沔厲於衡嶽惟神弗諗再覲始逢蒼水使者銜闔詔而趨迎黃帝巖書翼麓庭而發祕金簡瓊函瑤編銀瑑巡水之源斯備衍瀆之旨具栞苟非智瑩形析合契下鑿者曷以臻此故天下咸知大禹之誠至於沐日浴月流江決河家久旅而若忘門習馳而不入藁垂負掌楫楫乘泥斬高喬下鑿於溟滓之墟沙軌山樛泄夫孫皇之寶是以濡不給乾脛不生毛裸人

因之而來歸祖女見之而太息辛壬荒度呱呱者棄懷庚
子嚴齋頽頽者候夢故天下咸知大禹之勤若其治呂梁
修大陸創兗岱底雍梁則登乎孟門之上載乎壺口之安
南自華陰以滅高阜東至底柱以疏峻流散爲九河奠於
三門太史湧而有常徒駭潛而曲指於是穿雷夏之澤決
滎波之瀦彭蠡震澤之大以蓄其堙汝漢濟漯之濱以滑
其駛流沙寫弱水浮積石延寒谷引青泉丹沼順乎五行
赤岸黃支排乎四海使鶉首就粒食之生魚民返甸服之
處共操耒耜告成賦於中邦爭息閭閻得庶土之交正故
天下咸仰大禹之功夫民非食則不育食非土則不植所
以惠莫廣於濟元元澤莫近於拊饑渴地紐旣缺二帝謝

平成之基濫觴未修百王辭廣衍之斥惟能種水豐物爲
萬世利故天下咸知大禹之仁蓋自有熊問道徒劔履於
崆峒虞氏陟方攀弓髯於梧野非絕迹之能溯矧寓內之
未周降至後王或勤遠略戴勝虎齒之域穆滿曾游頭痛
身熱之區漢武初啟未有暢垓埏之廣踰血氣之親毛龍
在前飛菟屬後順則烏獸咸若怒則百靈請命桐柏之君
長稽首而肅兵龍關之華胥褰衣而示卦奇肱三面窮髮
九津銘之岳瀆之經疏爲山海之記故天下咸欽大禹之
神且以叢菁之當烈也舉益使治之而距海距川之患刈
矣以稼穡之宜播也舉稷使務之而艱食鮮食之貺奏矣
童律狂章之徒制其水怪鴟脾桓胡之魅授之庚辰皋陶

則拜厥昌言太嶽則羅爲心呂故天下咸知大禹之明由是視土觀地分州殊方聲教所隆要荒是暨暨亥把算二萬八千餘里大章展極五億十選之步渠搜貢珍毳之裘后土錫蹊蹄之獸愆餘相柳羣帝升臺印檢元都環牧享勳德有及而不治道無納而不徇故天下咸歸大禹之化鼓之舞之不軒不翥偉矣哉甯澄之綜敘而亶靈之藻溢矣於是鐘山燎祀升中於天陽翟秉圭職成於帝天方申其昆命帝亦去其菁華疾風迅雷彰於笙篳持衡擁璿調於磬虞蟠龍憤信於其藏元龜協吉於先定共遷虞以事夏乃猶謙讓而未遑也退處陰河之北陽山之南避嗣於商均遜賢於成伯旣僉同於朕志始受朔於神宗故天下

咸知大禹之讓時乃榮光興慶雲集百工相和六府孔修
赤文負圖黑風會紀則維貴爵而尙齒先賞而後罰面積
天若頌小正之時依永和聲譜大夏之律鉤車綏旃命相
土以佐任毋追深衣禘黃帝而宗髡朝據饋而趨士夕揮
輶而求言貨幣泐安邑之文金貝鑄厯山之圖折額疏狄
俯袂泣囚三年而百姓以遂焉五年而天下復樸矣然後
稽時巡之制而大會諸侯於塗山斯時也肇用大輦載乘
余輪雄虹建旌鳴鳶揭橦元璧若月丹珪如日紛紛回回
肅肅雍雍羣后齊趨靈神並致十有二州之殖罔不覃懷
千八百國之臻猶爲枝屬蓋執玉執帛者萬以爲計儻干
儻冕者日中不遑左應矩而右應繩聲爲律而身爲度瘞

精糈於名岫羊玉表虔施彫勒於朔宮雞彝瞻潔則有防
風後至亟狗兩觀之誅屈驚不恭威徙三曾之伐神姦咸
攝魍魅莫逢是以大陵比享俎豆於馨橋廟同規案盛盼
嚮此塗山之崇祀所以閱億載而無替也爾其山之爲狀
則高衍嵒嶮登降崩施翠嶂疊修瓊巖迴時勢峻嶒而獨
宏形沌渾而不鬱用能蒸電流颯膚雲澤穰穰氣奔蕩於千
里霧汨通乎層霄挽壽春之上流鎖維揚之巨鎮望巖則
衡峯遙佐地崇則岱嶽可循爲坤軸之所必爭天輪之所
必奔原夫山之始也脈聯荆揚湍激淮右軫石吼嘯於其
陂狂流滔湧於其際禹乃奮功鑿而洩之刻石確磈鏤燒
破析盤渦旣順疏峽就夷故二百十丈控淮之全四十六

里對荆之阜金樞舊穴昆明之劫灰猶存雪岸浮沙伊闕
之斧痕夜泛林樹森起若黼黻而朝芝蓋英飛得冠裳之
色是則樂聞截竹奏於禹會之邨粉合珠光拂彼啟母之
石塗山之盛煥矣如此而或者謂越裳甲楯卽鼎湖龍去
之鄉蜀路蠶叢亦玉泉負辰之地遂疑余山于渝嶺并遷
神蹟於會稽不知披輿圖者剖古今之分壤考王會者辨
大小之受共自太原宅都晉陽徙邑壞城平池焚兵散物
朝端建鼓車右立綏夫五載巡狩有虞氏之制也四方會
朝夏后氏之盛也立天下之中以秉天下之望而諸侯之
士不留於道路藩維之臣咸凜於天威豈復率九陽之辟
同問道於巴川捨七表之風獨垂裳於越絕是塗山之可

證者一也至於禪封灑霍鎔鼎條荆導淮則自壽春而北以合乎渦排泗則由廣陵而東以入乎海游泳譙沛疏鑿峯夔非混混以無稽皆班班之可指豈復先後殊其地而終始易其名是塗山之可證者二也且夫候人待娶實號嘉夷女橋來歸爰妃令德成室台桑之野我造彼昌孕貳轅轅之平度功弗子雖綏狐之說無徵化熊之言亦誕而江淮昏禮尙沿辛甲之辰濠右壻鄉終譜南音之曲是塗山之可證者三也至於剡水遺墟景棧鐘之制山陰故宙傳大計之名禮典本合乎省方敷試或隨乎駐蹕壇園域樹滋後論之偏疑假葬衣冠嘆前王之不復此皆推帝紀而足憑求夏厯而能祿雖少康紹業中興窮髮之鄉句踐

仍封創霸文身之俗而黃圖迴別紺谷誰移是塗山之可
證者四也惟是華殿棲神修除承享蘭橈奕奕松栢閑閑
陰映瓊臺凌乎清都之上玲瓏石闕幕乎泰時之中藻扃
晝閉遠降雲華觚棱夕張來咨風后徒觀其枯槎千尺幽
篁百叢元霧重陰閶颺生嘯檉瘦磊砢而垂乳楓鬼盤拘
而挈莖複道覓含楯軒霞譎丹柱歛絕飛鳥企乎明堂文
陛逶迤暗蚪屬乎岡嶺洵棲真之祕館觀上古之彤庭然
而閱歲愈遼庀工漸圯層櫺剝蝕懸棟離披蟲落星枿恐
毀螺書之仞翼頽斗拱遂愆鳳舞之儀何以肅共明禋齋
嚴報秩懷遠縣知縣孫君讓以嘉慶十八年到官救乏振
滯修廢舉墜安養阜成勤恤民隱寶寸陰之訓勿懈厥躬

凜朽索之箴克慎庶獄歲奉

朝命聿修祀事陟降在麓憬焉以思深懼夫聖王頌祇之
所弗眷於遐

國家薦歆之典將委於地且謂捍淮之衝者莫如塗山弭
淮之患者莫如大禹迴瀾其乂孰迷瓠子之歌高邈不騫
猶據青泥之篆惟我

昭代敷文玉鏡協瑞河圖蟻珠浮於三洲金鼎出於二峽
守斯土者其可不答揚休祐用布几筵塗墍巍峩鎮茲水
府也哉於是選材如雲構梁不日大裒役徒親佐畚鍤虛
檻咫尺憑其周垣省闈五重駕乎峭壁步武依世室之制
徑闡道夾牖之風零陵廟前空鼓琴瑟曲阜祠下自闢荆

榛安足比此清鏘方斯煜燿大矣美矣輪焉奐焉蓋經始於某月日落成於某月日鳩功若干計貲若干禮也然後天儀穆穆庶仗森森貝瑱珠閭之飾以賁其華茅茨土階之平以返其儉祭則山罍巖相玉柰金漿旅實於庭任土作貢馨香馘達昭告維虔謀勒豐珉以誌不朽乃徵下士俾抒其文履籤化人毗迹蠻服欽忱綴學但識夫追蠡探竒欲窺乎洞穴竊嘗溯源馬頰乘葦龍門道夏陽之邑而搜吉金之遺謁祝融之峯而臥穹碑之下懷睿猷之浩浩攬舊甸兮茫茫詡揚易隘贊述難名則惟推崇德報功之鉅記維新創造之庥雖敘績於偏隅庶追聲於匪頌來瞻聖域闡宣尼無間之言載鏤巉崖繼子厚留銘之石銘曰

二儀習坎參漏乘乾天水氣蘊人魚道旋湔河觀帝禱麓
循躔苞麻惟御洪範則詮三仞三沮六沴六事停瀨以涿
漚澗以漬葱嶺派九滄嶼函四陽烏攸居裸蟲丕被填災
援沈心瘵形瘖河壇飛錫亥旣奉珠風驚鷁涌水起龍扶
吾誠不忒疇敢以渝乃作司空平成覆載乃總朕師經營
華外干羽格苗絲竹感瑞天下爲家酬勛弗逮信彼塗山
維禹甸之爰始導淮激蕩嶮巖中審山脈剖而爲岐伏淪
恬源通泗會沂磅礴綿流煥爛綺錯海溥東鍵河湄南絡
登詔藩后述職方岳珣戈董威鉤車效樸遠陳龜壁甫棄
舟航礪砥矸丹織縷筐筐靡壞弗臻惟德是翔粉藻灼灼
磬管鏘鏘脫屣一朝扇薰廣運朔正貿遷蒸嘗迭晉谷峙

淵和天鈐海潤遺簪九服燔柴千仞荆淮之中宅有幽宮
翳彼白日颯然神風松楸瑟瑟岡阜濛濛元武映北紫燕
朝東荀淑宰懷史晨相魯肅焉如在惕焉恐侮爰究爰度
式歌式舞沈沈壺奧鬱鬱庭廡斟明水兮椒盤叩屢窗兮
揚鑿巫善步兮山址蛟不鳴兮江湍淮有茅兮茅三脊藉
桂酒兮貢黍稷惟神致禴兮禮樂諧奠淮陽兮鞏

皇國刻桷兮丹楹戢庸兮順則引齡兮無極視此兮偉碣

綠玉詞序

方履錢

徐君經汝秉淵睿之器懷醇和之心樸學自勵卓德不羣
仲舒之圃三年未窺智深之家五日不食心鏡典籍伏鸞
隱其名識綴篇章雕龍擅其彩洵可以馳蹤儒軌蔚炳國
華者也稟命不融弱歲而逝豐厥聲靈吝此永祿瑤圖乍
披清芬終沫元經初寫風流已枯芝蘭焚質室有餘芳卷
施抽心庭無宿草哀哉凋碧玉之奇色銷紫石之末光閱
千載而猶悲雖百夫其奚贖遺文百首友人緝之鳴鐘在
水尙動知音孤桐摧根久翔逸韻抽翰之暇旁及短調嘔
心之言徵於將亡此綠玉詞者亦劉遵之碎璧也流連時
遇默感窮憂詞飾煙霞志悲風雨幽香入袂遠泛春波豔

骨若仙怨遲明月簪花舞曲並見迴腸載酒吟樽難消愁
氣是則汨羅未返先成懷石之歌賦鵬將終已類投湘之
哭者矣自君厭世每握斯編介歡筵之欲闌招君子之舊
侶各舉穎辭同爲妙賞此唱彼和盡屬變徵之音長吟短
呻遂激清商之怒魂荏苒而攄碧泣嗚咽而流丹撼山陽
之笛湘竹全瘖過黃公之壚玉山易倒明河一尺溼雲千
圍庭樹迷離落葉橫亂斷蟻相答悲鳥驚飛寒燭之背疏
櫺之罅如見形影晻映殘席痛呼不前相卽無覩豈君之
神魄尙有繫於此乎起九泉之枕未忘斯人穿十步之隧
欲問今夕冥誠之感未可知也履錢少羈隴末偶歸寓邦
迹同閉門心如合轍與君之交久銘中懷聞君後言亦愛

蒙陋縞紵契晤游無多忽聞溘亡悔念曷已茲有薊城
之役深感宿隴之思因舉小集先付梓人秦瑟引吭聲初
肆于宮商楚劍埋鋒光自騰于牛斗有傷寥落伸言慷慨
乃作此序以冠其端

仙山塵夢圖序

方履錢

吾友楊子劬起以所作仙山塵夢圖照相示命系以序余
觀其爲圖也繒翠一闌縹紅十尺裁瓊鎖軸鏤壁簪楣展
芬溢指舒藻悅魂瑤樓曲曲天桃結牆雕扉重重垂楊縮
鑰甲朝未起風迴小苑之東午夜初陰人在闌干之北加
以春凝裾遠月擁鬟來浣紗湖畔背手微吟姑射山頭顰
眉善怨羅塵滿鞦韆映蓮花之一叢細骨牽裳賜眞珠之百
琲天孫織館海燕窺梁王母歌臺青鸞奏曲珍之所萃中
有人焉斂襟彩逸珂帽神清籤書成城抽豪列岫龍團茶
冷漱玉無聲鵲尾香沈裊霞如縷埽花圍裊雜舜華之佩
丸墨盈斗譜石黛之歌芙蓉腕底淺拂雲箋翡翠簾前代

融匳管不日不月云誰之思是耶非耶顧我則笑幻哉斯
境麗矣其仙夫解纒結言悲懷故宇含波通素寄心君王
本以緣情隱關綺語織縑初罷誰察雙蛾學繡未成難工
巧笑影形羞並榛苓有思蹇修不來菘菹盈室同心離疏
莫憐瓊瑋閨中窈遠空獻明璫碧蟾炯炯忽悟前身丹蜺
蘧蘧或能先覺是知同游洛浦嘆瑤佩之終虛久謁臨邛
感鳴琴之難遇既遺世其若塵定傾城而獨立此卽圖之
所由作也余惟徘徊日暮窈窕年華攬明鏡於中懷恨瀛
臺之易隔迴腸九折敢寫相思有美一人忍與終古掩卷
默契恍若有亡誰能西歸牽裳恐阻攜珠盤於逝水悲甍
翼於中途請質斯言爲君增意

陸祁生宣南話舊圖序

方履錢

僕於哲人正交之道嘗識之矣儒行曰合志同方營道同術孔子曰卒遇故人曾無舊言則吾鄙之是知鳥煦魚沫匿就其儕白羽素絲投於所習草蟲既躍聲氣相求風馬雖殊標榜緣達故有披襟暫面望塵寄懷示以丹心悅其華藻神魂繫乎千里愉戚同於畢生盍簪則秀榦敷妍惜逝則寒叢零葉尙論古人未知所裁惟我友生實符斯願於是陸君祁生言念古歡悵然遐日感曜靈之急馭知陳迹之易迷迺伸豪約楮設境寓情屬盛君大士代作宣南話舊圖而命同人系之詩以記焉時則霜颺乍警清陰滿空砌藥朝飛庭果宵墜都館蒙密層牖閒敞虞翻別榻奇

書盡陳管甯藜牀坐客恆滿哈笑旣作狂歌相答各謀樽
酒爭浮瓜李六博彈碁閒以絲竹主賓相忘樂不可竟至
於晨鏡未闌宵月當午輒復留連促膝述往傷懷思南皮
之勝游悲山陽之逝侶涼露有聲鳴烏夜起不知攜手何
以泣然嗟乎一士之生別于傭保百年之內促于脩名欲
與結綬天閣高議雲臺奏禮千卷立功萬里招拔類之友
不世出之才進揖皋龍退哂枚馬斯其上也否則列館西
河講學東淹纂組絕業自名一家絃誦六藝郭郭百氏守
先聖之遺緒求至道之大經抑其次也下之亦欲蟄影窮
谷韜光重淵製芟相酬采藥以贈具茅容之雞黍呼龐公
之妻子同爲農夫長謝世網致足樂矣而獨俯仰失時牽

率喪志鉛刀不藏燕石空眩束縲加肘偃壤側足戚戚嗟
嗟至於沒齒秋風一來奔走四海骨肉之愛去若斷絲心
膺之契傷如脫箝死生契闊之怨羈旅淪薄之思靡日不
臻何人能免雖使怡衍良辰逍遙讌飲晨夢易寤瞬息已
非豈足消大噫之氣飫屬車之愁乎入斯圖者凡二十有
八人皆以特立獨行厚鄙勤類擅文章之譽得狂狷之名
而所企不過一尺之階所患不過一簞之食仰息者高於
虹霓紆體者卑於渤澥登降殊軌益亢難鳴慷慨而起可
勝道哉人之志慮悔不早立僕也愧南州之高士從洛陽
之少年徇名未甘遁俗已晚行當葺宇幽岫爲人外之游
耳昔瑯琊王秀之慕宗測之高風輒繪其形與己相對他

日懷舊之作君倘有意於此乎若夫歌十畝之詩寫白檀
之扇並耕終年臥游狹室如嗣宗之遇蘇門長康之畫幼
輿使知之者著於泉石之中求之者晤於行障之上則斯
圖不廢宜爲先聲恐亦非僕之所敢期也聊以記之云爾

游菊江亭記

方履錢

東流故彭澤鄉也城東有洲故老相傳爲陶淵明種菊之所後人葺亭其閒故名之曰菊江亭排碕遠駕飛觀盪峙憑乎陂陀乃構絛渺長川百折怒濤已回曲漱十尋沖波相抱登亭之巔則納彭蠡于左襟巢皖口于右睫鳴颺在鐸鐘簧一音晴日上牖金碧異彩不獨撫此松菊留連遺風而江山之美亦可以遠託矣嘉慶二十三年仲春之杪余薄游江上憩于東流適吾友李君申耆張君彥惟皆應邑人之聘來修方志浮雲共翔轉蓬相繫奇蹤旣覲離緒畢申遂復載酒命屐造于亭下于時春潮初起黃柳已青同挹曉華各藉芳草坐帆影于中流飲蘿樽于遙嶂此送

一詠和風徐來彼酬一嘯明霞久駐選日之樂逸興未窮
舉觴而起欲酬陶君飄塵入帷不可彷彿然後知遜志之
士遐暢其生寄迹一往尚無所追矧乎遠巡浮萍之中貽
藉榮辱之事者哉夫淵明在官不及百旬秫田早植秋花
並茂良其高意自足快然忘時所遇偶適契焉終老故得
進不羈俗退以娛生也今吾與二君未能戢鱗翼而游擇
藜蕪而處野馬足以縛其身鹽車足以廢其志結覽之願
動輒相違若茲斗酒在前心交俱集延瞰萬里俯仰一世
不啻吸橫江御闔風而立於滄溟之表下視棲息瞬于蟬
螿亦聊以展其物外之思殫其賞心之悟而已千載之後
甯與古人異乎言有所蘊乃涉筆而爲之記

再答董方立書

方履錢

方立足下前奉到惠書第三札并新獲隋唐誌撮十種幸甚幸甚破函忙瞬芬彩言溢玉鉤雅麗足稔近學鑒我癖古珍錫羣帖摘華粲粲垂穎皆珠韜翰斌斌凝楮成玉杼列滿座如升太學之堂耽玩兼旬乃作錦囊之貲損茲嘉意勉其摹楷幸甚幸甚自與子別四時將周流鴻鼓風已復北鄉秋草盈陌凋盡江南今已仲冬泱寥尤甚僕陳書沒肘擘隸補窗斂卷而嘯不知天地狂吟達戶時無昕夕五夜雖短可燭萬古十年未暇收於寸眸計念足下當乎此時傭業稍闌誦理有隙探志通經則鄭孔潛歛求瑕邱索則左馬默慙矧乎文章發以情思惟相與酬答不詳何

人欲駕喬雲謁子西國層飆阻魂溼月沈夢衣裾有聲簾
帷無影我勞懷人柰何而已哲舅家居時相過從爲文益
工所遇猶替楊生劬起同此岑愁足下近作幸速寄覽能
令故人駢手吟諷亦甚快也計此書達當在臘餘春風初
興神骨多解善備旅寒幸加餐飯光彩所臨相見有日

江西廣信府知府贈振威將軍安徽巡撫康公神道

碑

方履錢

蓋聞長河一曲所以養其濬流層阜四成所以植其崇巘
是以駿哲挺生秉彝元淑景靈渥曜闕網韜延其偉績之
所敷醕質之所蘊必能建盛業于當世貽崇廕于永久振
民育德固仁者之宏規積惠重厚乃隆家之懋祚五際遷
運君子之澤常存八柱通維達人之功不泯若今之卓然
可徵者其惟我康公乎公諱基淵字靜溪號南圃山西興
縣人也遼裔難詳先牒丕敘東土命氏則康叔啟宗西域
入朝則康居衍胄豫章精舍共希處士之風扶風雜編傳
自中郎之使曾祖太雍祖萬方並以潛曜棲音未華纓紱

父愷邑庠生贈資政大夫體道而盤劬學自勵閭黨受其
甄誨士倫憚其嚴修卜築初就四楹列同產之居儋石無
儲千金償故人之責裴楷別宅以讓兄朱雋貨緡以解友
篤行備于門內義聲達于邊隅遐紀未臻翼謀斯峻公應
靈雷泉降和太極表精暉之朗凝器範之穹先是公仲兄
江南河道總督茂園公之生也母王夫人夢雙鶴翔舞其
一先下次年誕公復夢前鶴馴集旁有緇流告曰此君家
之瑞也魏肇飛雀之祥興宗已兆徐陵集鳳之感秀異所
鍾毀齒之年卽罹孤瘁沖弱而痛貫黃墟敬養而潔徵朱
萼一言一行敦穆于閨庭靡愆靡悔肅邕于矩步偕茂園
公潛心研求銳意講誦約繩之際七業俱興斫屨之餘十

經並授默吟終旦而慈母不聞屬筆逾旬而里師驚咋惡
臥則含冰嘆面忍寒則徹火移牀於是義府辭鋒標于百
仞言泉文律該于九流王僧謙之圖籍共慰殷憂童漢文
之高名先膺辟召公年二十一舉于鄉二十二成進士歸
班銓授河南嵩縣知縣緇衣懷玉純錦製帽人惜士元之
才民訝子奇之少公厲冬冰之潔沛春露之滋不僻其鄉
不陋其俗提耳申訓癯顏勤名暴虎化而爲狸陽鱗退而
辭餌嚴刑凜於閭室煦愛比於所生笠織僅存見褚珍之
節釜竈不設知何紹之廉嵩土境瘠而伊水環複茨防旣
廢陂瀆就湮旱浸不時黎元重困公乃疏地絡之崇庠遏
水門之衝要舄鹵可植不損魚捕之饒漑溢日增無俟龍

骨之見凡通故渠十有一道鑿新渠二十有五而歲於是乎始稔又以壤不宜稻耕者鮮穫公乃辨桐穗之性橋墳埴之功稽五物於周官疏六宜於鴻烈使農專務黍麥繼以麻藍而財於是乎始阜蠶織未繁民艱於服公乃督之棧廩導以杼機師糞遂口種之規同元淑代春之效使民植桑柘萬株閒以木棉之種而用於是乎始裕嵩邑界接宛胸舊貢百合吏課于野民擾于閭公乃采閒田假丁力上不闕其所供下不責其所乏創爲百合園亭四十畝而患於是乎始消生業有制逸游是虞公乃判鄉井立橫舍賓禮俊雅開悟蒙穉鄉飲揖讓諷誦有程凡建社學三十四所而教於是乎始洽然後黨耜朝舉丹軸宵鳴黃髮含

哺青衿釋奠春日起條桑之詠秋田賡刈藍之章阡陌之上芬若椒蘭庭戶之間甘於芝醴空衢懸寶鄭宏之政初成足下生麓岑君之民何樂漁陽千頃未足比其仁潁川四長無以求其匹范甯交州之石新樂成行許楊鴻卻之陂澄波若練鏘鏘乎款款乎古之循惠不是過也偉績已彰屢書上考民既奔走籲留公亦請竟其事在嵩九年治乃大備

高宗純皇帝聞而嘉之下詔褒美敘勛進秩一等之加祭彤見賞于漢祖百城之表樂藹荷寵于梁君公膺斯祐當世榮之無何丁王太夫人艱過毀忘譏死孝貽慮翠柏之枝驟改白兔之足頻游服除銓授甘肅鎮原縣知縣姑臧

之市未潤脂膏。龜池之碑獨銘祥異。歷遷甯夏。平番。皋蘭。三縣所居民富。所去見思。邑中黃犢望畫轡而輒留。道上青泥借珍藥而俱至。吳郡聽統如之鼓。會稽有待選之錢。未幾擢肅州知州。飭躬則惟飲。桑柘勤務則常含。瓦石摘獄則嗤鉤距之煩。徵賦則削單虛之籍。肅州古稱酒泉地。鄰戈壁苦泛濫之災。乏薪樵之用。惟公精思必達。心計無垠。度其荒原。但課十圍之柳。因其舊洫。以決萬仞之泉。鷓鴣未鳴。先資播種。鴉音已徙。更布醲和。碩士盈庭。餘糧棲畝。春入玉關之塞。風移雪嶺之陽。回羯肆暴殲伐。逾時遺眾數千。負嶠乞降。窮谷幽險。狡情難測。公請以單騎深入。遂造其壘。震以名德。申以威信。渠帥涕泣而自係。校聯歌

舞而凱還忠奮直前奇功乃奏此則張綱廣運之勇趙熹
簡陽之志也旣又擢任江西廣信府知府其始至也如祥
颯之振枯其漸漬也如神河之潤遠日南雙雁棲於垂箔
之前淮陰二鹿隨於輕輪之側溺女之俗江右爲盛公聞
而愍之卽爲設嚴禁宣明教延誘耄耋調養貧弱未及甚
月釐然更悔女囚之壑忘曠曠之陰珠孃之稱保呱呱之
愛以賈父之所生借鄭公而爲字慈育之化其有涯乎乃
欲銷鋏石於累旬變枳棘於中野銀艾有十要之慶金螭
加三最之榮景命不融薜期倏及以乾隆四十九年某月
終于官舍年五十有六嗚呼愷悌在躬利澤及物回斗極
之命者億祿難窮留棠陰之頌者千齡無歇廬江白馬尸

祝起于生前荆郢素冠哀咽沸于歸路徒使冥冥日月呼
九閻以無從切切絃歌痛百身之莫贖而公遂以魂招而
不復也公風神清邃雅韻淹流參東籟之貞等南金之照
杜宏治之盛德標鮮王文度之志力彊正學通綿表而不
守章句之專文騁飛豪而不以浮藻炫眾虛懷以納善博
施以逮下祿入則壽其九族宦久而家無一椽公嘗游山
陽愛其風土買田花洞未遂生平歸旆芒山竟占佳域榮
陽舊產未開千橘之園河內新阡詎擇萬桑之利以嘉慶
三年葬于濟源縣劉楊邨之麓禮也公有子六人長曰儀
鈞舉人內閣中書次曰綸鈞進士通政司參議出嗣於茂
園公三曰文鐸舉人候選教諭四曰綜鈺兩淮鹽庫大使

候選運同五曰紹鏞進士禮部侍郎六曰維錦舉人山東
信陽場鹽大使皆以光耀珪璋聲華軒冕承慶雲之徽烈
著英風以象賢社照神光應氏之宗方顯門多畫戟馮楊
之緒尤昌迨公歿後十餘年通政始官吏曹恭逢

慶典貤贈公爲朝議大夫吏部考功司郎中又後十年侍
郎開府皖中復遇

覃恩晉贈公爲振威將軍兵部侍郎安徽巡撫兼提督銜
淑配同郡孫氏繼配王氏皆貤贈恭人晉贈一品夫人繼
配江蘇顧氏貤封太恭人晉封一品太夫人煒矣哉赫然
寵榮賁于後嗣然後知寢邱邁種之長潼亭清德之永也
又其後五年運同侍郎俱以遭顧太夫人憂解職歸葬載

瞻松檟益愴先型循覽岡原莫追遺範懼循猷之或佚思
盛美之宜彰爰是礪具貞珉列諸神隧不揆空薄命譏菲
詞履籤弱年侍宦曾歷金城壯歲驅車遂登嵩嶽見陸公
配食之社酌酒未乾過張君爲政之邦歌音相續每欲抒
揚讜行讚述清芬故敢忘其名齒之卑效其文詞之躋託
之元石以識不刊樊惠渠之頌勒景鐘而無慙陳太邱之
碑編史籍而不改乃作銘曰

王屋岌岌沈流泱泱我公幽城峙于其陽惟公之生資氣
清剛思心精叡綜物茂良克岐克嶷爰孝爰友揚聲紫微
出綰青綬害馬除菑飲羊洗垢灑沈旣安羸瘠旣阜析其
湍流沃于甘壤干耦同歡萬鍾斯享男執晨經女操夜紡

攝齊升堂乃誘乃獎夫地之利公式啟之父母之慈公式
畀之公之所屆春臺熙熙公之所違饗祀丕丕百里小宰
仰紆

帝眷

璽書寵賚循勞彪煥洊歷雄州旋膺方面節猶日峻政同
前善榦量未究台輔未崇寒氛忽至仁賢道窮珠林委露
玉樹摧風湘泉幽咽孰訴蒼穹運嗇厥身祐蓄爾胄符策
九百金庭所授八龍五鳳英英競茂慶靈下賁瑰琦克構
實惟季嗣爲

國重臣內典三禮外撫四垠追奉貴秩徽卓顯尊魂爽攸
荷懷此秘芬灑淚之厚下馬之壠鶴蓋松欹龜趺花擁陵

谷罔買桓表俱聳眎此先德百祿是總

甘肅鞏昌府知府護理鞏秦階道胡息齋先生別傳

方履錢

先生諱紀謨字獻嘉浙江山陰人也寄居直隸通州遂入通州籍王家江左百代仰爲清宗陸機東來當世重其碩望先生秀質嶷生見者自遠風神軒舉迥然不羣授元幼日旣探奧義躡屩壯歲乃推經師奉菽愔愔窺雲闈之顏色采華粲粲陟芳岵而懷悲先生於未衰之年痛摧二親迫家食之饑尙容千里視寢視含惟資弱妹不恤不弔罄所遺藏外人皆爲先生傷之而先生哀踟躕之莫從勵友恭之愈篤時有外姻某氏以閭闔之怨構角弓之訟聞先生風愧慙而輟沐蘇瓊之化相揖均田入王烈之鄉皆恥

爲盜君子潔其身而同者合振其采而鄙夫寬豈徒虛語
迺今知之又嘗僦舟北行羈遲旣久同濟者數十人皆告
乏食先生竭貲以頒始盡獲免貸而不書訖莫知其名族
義非所市終不答以里居南山之壽爭頌潘郎青麥之謠
旨達莊老慨恤勤施罕有尙焉迨于一尺之符筮分天水
五幡之綬遠登玉關志百鍊而不消御萬仞而必叱才辨
無雙則羣司傾座粲爛日下則蒼庶悅心是以量移數郡
遷宦十年莅成縣鎮原安定中衛諸邑升授安西直隸州
知州庭有和風縣無逋事政成三月延頸者徧寰封星改
一方阻輪者滿行轍先是逆虜縱軼弄兵潢池妖氛蔓延
問途隴左旣已折馘將謀會殲先生憫彼脅從及於耄稚

錄請別減盡釋其辜而鳳翔之妖民雷得本等又將驅惑以應先生奉檄治之至則呼彼都之牧令借此邦之父老酬酒於樽列樂於座詠山中之風土問行畝之東西而輕騎倏還渠魁已得夕陽尙紅酬醕映碧眾皆大駭始知嘯歌於長吏之庭決勝於賊人之室邳彤機老全解嚴城之扉謝傅神恬速展前驅之甲外戶無扃兵威夙閉先生之勛蓋銘太常而無愧矣于時

天子方考九輿披八索詢河流之異證傳注之誣知清濁之淆於渭涇也

命大吏求其源大吏以屬之先生乃登首陽歷大夏踰終南石室之險溯鳥鼠同穴之濱至於涇川之開頭山得涇

之源焉瑩石如瓊可析豪髮激流若鑑安雜滓汗爰著涇源記一編以獻于

朝此則鄒衍炙轂謝神經之未詳張騫浮槎慙斗牛之荒渺者也未幾擢鞏昌府知府攝鞏秦階道將期經綸彌廣响嘔益深泉冽玉漿案陳瓠脯豐五雞二彘之養致千耦萬箱之樂孰知台職未崇良臣不憊年齡俄頃風電相推郡中赤土惟封半篋之書關上青泥難易十旬之粟豈不哀哉先生頤廣而隆髯疏而挺朗朗鑒物爛爛增彩葆光含息天倪往來自云中歲常航元經咽華咀氣之精鳧浴鷗視之要旣而思眞宰之契不外市朝神仙之洲莫非道岸因以束髮還嶠折簪入世又自言曾爲冥曹剖決陰獄

泰山使者攝生人之魂地下主文當強仕之日蓋其凝壹之氣六合同其陰陽純直之心九幽受其陶鑄列子云上闕青天下潛黃泉劉安曰馳於方外休乎宇內若先生者可謂符之矣且以識貫遙邇學粹古今豪翰爭飛金玉相儷春日初午聞高吟以入空秋山乍晴喻清抱之在室著有知足居詩若干卷言山澤之性靈布六文於六律繪閭閻之饑渴皆一字而一珠豈濡脂染墨者所得同年而語哉履錢初侍嚴親官於甘肅先生與家大人交相友善見履錢而愛之選詞爲駢走箋命和揄揚不絕于口保抱不離於懷十紀之童攜之而並列耆宿一韻之美咏之而徧駭公卿子春之旗鼓自當管生周君之塵尾獨資袁憲嗟

乎生世落落窮年悠悠斗筭之才亦妒乃周納其狂名跬
步之階未登卽指目爲賤士白眼環于左右雌黃密于網
羅則惠我辭色榮過于加華袞知己片言恩深於肉白骨
也而況先生之於履錢者乎丹泉汨地悲無時之可忘白
雪在天亦何人之能述謹綜厥行略志其遺美爲之別傳
所以風來禩之楷模備史乘之按采云爾

祭周筓雲文

方履篋

歲惟元默次于大涖周子筓雲卒於漢皋之旅嗚呼駛電
匿影沈月不光菁華汨于崇朝哀忱起于中夜龍蛇之厄
挾十仞而泉飛夢雞之晨叩九閭而星落應汝南之著作
不名其官吳季重之善愁終之以命啟文園之篋封禪之
書將亡披子雲之帷草元之心未化嗟乎滔滔逝水不能
駐金石之流冉冉行雲豈殊于蜉蝣之瞬惟當世以誰懟
假大地而埋憂達士之寄今乃言旋勞人之生識不如死
然而摧千尺之桐竟先撥其枝葉刈百畝之蕙又遽傷其
根芟安仁悼逝之時未周于歲蘭成傷往之作不絕于書
匪朝伊夕掬瓊瑰於盈懷跼地踏天根尺蠖之無足拓落

寡耦崎嶇損歡入室靡覩出門何之藜蒿泣雨圍十口之棺茅簷坐霜冷三生之夢望故鄉而不見類飛蓬之焉如因其伯兄宦於嶺粵將往依之未及至也悲秋羈舍殉之以身躡躑冥途欲迷其徑枕函簡而長謝御布衾以永休十千市木未知視斂之人萬里停輿定多欺貧之鬼寒煙夕卷斷葉驚飛鄰笛乍起臥白骨而酸魂生芻載將以蒼蠅爲弔客人之生也死固其所死之爲累乃若是其淒怨乎歌薤露以何時仰昊穹而莫答所謂修文繼職玉棺降空賈太傅之賦鵬王子猷之亡琴千悲萬恨何可勝言一號三呼魂終不復以今況之增痛靡已旣卒之後更閱一載其友人之在京師者始克知之素車奔赴同慙元伯之

靈寶劍初鳴難覩徐君之塚因儼其夙寓爲位而哭懼神
遠之未格也乃爲文以招而祭曰

黃雲瑟瑟丹楓湛湛魂兮歸來念此夙忱惟子之生志度
淵粹荃蘭之姿爲世珍瑞既有令德穆於清風既有丕文
侔於化工秋水照神春霞麗物良璞在躬其彩焉拂莊元
之誼銘衷凝素發言彪炳爰談爰賦時之不達道屈未伸
百治之銑乃棲埃塵命之不淑幽閉其世遭家不造終屏
憂悴載駕我車于陝之鄉載依我兄於嶺之陽崔嵬其愁
馳驅其怠運極命衰隕越爲害涼沙掩旒窮月侵肌朔颿
一來靈魂誰依名山之編藏于足後嘔心而亡繫子是咎
子之家室盡汨重泉潛質相晤慰子後先楸輻未安魄苦

相近魂其久淹湖湘之境友恭是則思兄未忘魂其有知
隨流而颺十棺之穴兆于隴左魂其遠行或侑或妥少微
作芒離離晨嚮魂兮歸來歸于天上惟我素執判袂有年
渥彩懷音夢寐是延求之不得泣涕漣漣若乃灑桂醕藉以
清爵斗酒隻雞酬於三步迹徧湘干佩捐澧浦神廳肅然
粵嶺載欽鑒此明潔魂兮來歆

謁紫虛元君文

方履錢

蓋聞雲軒甲帳花氣掩乎幽崑月戶庚郵玉光通乎清霓
登芙蓉之嶽初聽鸞音入檉柏之巖如逢鶴翼惟神沈珠
曜質靈鏡澤胸託體宅相之闡應迹令君之宇玉蘭仙媛
實平子之所生太華神姑爲貳師之良匹遂乃資承丹錄
咀詠白琅香嬰滿闕羽姬下而相迎笈帑啟堂安妃來而
徐步樓中黛影猶對青琴匣裏素絲微吟碧柰抒九元之
逸度躡五辰之祕光霈惠福於羣生寫遺徽於孤麓維茲
沐澗分派行山林藿絳濛濛波隱複玉梁未駕卽是真虛
之宮練石橫開已見純青之字風關歷歷地隔三塵霧縠
蕭蕭天留一綫陳其錦襪東宮靈照之媿挹彼紫漿西極

婉妘之后莫不欣覘妙構假號洞冥昭煒灼之清暉駐儀
璘之貞旃危峯標韻寒淙效深庶有徵焉豈其爽也猥以
穠稔下士趨越行尸山陽聞笛棲泊經年洛浦浮煙眷懷
靡已將欲牽翠薜叩丹扃澣濯塵容憑陵秀巘恭聞馨烈
實感愚誠來過聖女之祠欲奏通天之表客非鄧郁降瑤
鶴以何時室異蔡經望明虬之徒遠雖人間長史難授交
梨而太極僊侯或傳鍊桂母使鳴湍怒碣截谷口之轅飛
霞巖颺杜曲椒之屐則鏐虹寶典格夢寐而非遙姑射冰
姿儻髣髴其可親仰遲蒨闕俯鑒元文

扶風縣唐楊珣碑跋

宋世華

穹碑雲矗刻海馬以環趺巨石路橫任邨牛之礪角剔來
苔蘚認是龍章何處松楸久迷馬鬣手煤淺搨倚樹長吁
夫以明皇履盛而驕未勤已倦天亡姚宋坐牛相於綸垣
地關燕雲臥豬溲於御榻識此胡貌有反相偏付兵權欲
朕躬不出長安遂恣聲色爾乃鴻離魚網應聚鷗精恩辜
半臂於穰妻寵萃一身於肥婢偷甯哥之玉篋三弄聲殘
賜祿兒以金錢九闈笑徹鹿含花去那知五宅倉黃獨亂
局翻真誤一匳黑白彼國忠者迹緣瓜葛技飾樗蒲醜久
播於狐綏穢或傳爲蝨孽招搖錦隊并無狎客之才偃蹇
台司坐啟叛臣之釁猶復寄田蚡以鈞軸歸美所生錫孔

惺以鼎銘追褒先世仙豪親吮玉環捧研之時豐碣大書
鐵畫垂雲之勢命東宮使題額臣亨再拜以書名榮武部
以加封汝家奕世其受福具曰予聖丕乃大言何其俱也
泊乎冰釋山傾石留墨繡貞珉自壽九重諛墓之辭社飯
誰來千古覆車之鑿震到漁陽鼙鼓八姨之粉骨全灰聽
殘劍閣淋鈴三郎之玉顛并杳惟此碑未淪榛莽獨立蒼
茫蛇蚓尙蟠兔鳥任逐紅塵徧閱叱翁仲使深藏粉騎曾
飛憶門楣於往事山鳥問上皇之安否石但點頭野老識
宰相之姓名鬼應墮淚請加椎蠟圖合伴夫夜游勿誚墨
豬蹟孰尊於天藻

書幾社考後

袁翼

幾社考二卷得於吳閫市肆尾缺數頁不著撰人做襄陽耆舊之編補江上孤忠之錄感時蒿目略述原心與沈芝光復社紀事杜九高社事始末可以參觀者也昔范蔚宗破史格創立黨錮傳識者傷之溯自熹廟之倦勤實乃明家之末造搢紳分洛蜀爲門戶閹兒視名器如弁髦西李邀封稷狐社鼠東林點將地煞天罡迨涇陽之首善旣撤西銘之盟長代興天子問吉士之起居闔閭聯黨魁之聲氣而彝仲臥子諸賢亦復刑牲於白苳之城設蒞於黃門之宅通縞帶者萬人飲平原者十日維時赤羽警於三邊黃巾滿於六宇而牛心麀尾競尙清談龍腹虎頭互相標

榜卒至蕭不並蘭鶚能啄鳳貽貂璫以口實樹敵國於眉
閒及白旄鮪水甲子徇師青蓋洛陽庚申出迪蕩綸扉於
茂草殉崑玉於劫灰又奚補哉幾社諸公蠶叢已失猶招
白帝之魂龜鼎雖遷不搏青城之額三旬逆命螳螂之臂
孤撐七校裹瘡鯨鯢之腥橫爛肉餐鬼妾童子登陴火炳
神鐙菜傭制梃此固忠孝著於粉榆義烈彰於史冊者矣
其有廁名仕版造膝經廬子魚拾金黃允黜婦疾風勁草
板蕩誠臣猶有愧焉然而韓仇旣報留侯可作漢臣梁祚
告終開府遂餐周粟何必緇衣髡首泣題東寺之詩黑水
歸雲擊碎西臺之竹也幾社而後又有得朋須友春藻大
雅諸會振前輩之音塵續傳鐙之香火小草閒花尙繞隋

隄之樹張弓挾彈空描孟昶之容等於自郤之無譏比諸
殘唐之歇後夫取友非詩酒之媒講學豈國家之福其始
亦砥礪名節枕藉經史而涓流不塞致洩蹶窪燭火微延
終燎原野況若古晉諸人才不及君廚學未窺閩洛乃欲
刑白馬於洹上立赤幟於趙軍則又己巳以前諸公所齒
冷者也

書王義士虞山柳枝詞後

袁翼

紅亭樂府三閭屈子之騷青史功名五代瀛王之傳漁獵
聲色調侃滄桑妾爲北里之班頭君有南山之捷徑遂使
幾輩黨魁壞茲朝局僞傳筆札流播人間莫不以爲名士
傾城天水比肩之耦婦人醞酒信陵求死之方也已河東
君者一字影憐虞山錢氏姬也始則金屋重臺家鄰茂苑
繼而花奴樂部籍隸平康芳姿之團扇早捐蘇小之油壁
競載當金甌卜相修憾烏程紅杏填詞養疴白下幾復聯
社遙執牛耳之盟標榜流風煽及蛾眉之隊紗巾裹玉飾
紅拂之喬妝帷幕從僚投正平之傲刺野田露浥始影星
奔疑來擲果之檀奴忽幻散花之鹿女姬之爲媵蓋在尙

書充隱時也於是絨頭綾腳緣訂三生瑟腹箏腰目成片
語絳雲遮處蕊宮花史之居紅豆生時秋水琴河之夢桂
胎載得桃根鴻寶收於蛤枕藥鑪茗椀之當家詹匠鬢師
之慧業相期仙眷老是柔鄉豈知青蓋蒙塵鶻嗥故寺紫
臺出塞鶴去新亭援太樸於井中爲修國史嘲夢炎於殿
上恥殺王孫彌戾之車未能解脫我聞之室但祝長生梅
嶺蘭山之外尙有餐妾之人冰天雪窖之中猶臥吞瓊之
士嗚呼赧矣河東傳中謂姬殺粉然脂才思側豔長齋繡
佛妙悟皈心玉臺十九注成炙輠之編雲笈七千寫以簪
花之格神武香姜之瓦能辨澄泥楊娃團扇之詩自摩小
印詎知蘼蕪薄倖仍約問郎芍藥相將慣藏男妾凡所著

述非虞山僞託卽狎客錢岱勛捉刀也虞山少習房術老
爲椽人及柳委身不能御女秋風苜蓿久病龍媒夜雨芙
蓉空俛蟬鬢而攝摩登迦於婬席坐丁外人於私幃野鶩
栖煙禿鶩唬露不待轅文破錢之詞虎邱題壁之謔而此
老之背如負芒刺矣說者謂指劍握繩沈郎有慙婢帥解
讐殉義程嬰竟保藐孤紫玉貞輝青綾晚節豈知陽臺侍
櫛已忘蘇蕙之璇璣劫火焚樓盡燬魏收之穢史人謀咕
囁鬼瞰彷徨必有搜絳樹以出欄引翩鴉以毀室者而乃
四禪天內柳絮沾泥半野堂前松枝畢命豈若元英碎首
釋嚴武之嫌綠珠隕軀報季倫之寵哉乃登徒好色迂士
嗜痴例以貞娥掄爲小傳瑣屑閨事膾炙詞壇豈知南內

琵琶開寶之遺黎未盡西湖花月癸辛之雜志猶存皮裏
春秋鬼中南董如義士柳枝詞可謂盡發其覆者也

印古琴白下聯吟集序

袁翼

山川都邑之盛人物儀容之美莫過於金陵乙科選士於
焉雲集傾蓋千里射策萬人流品既分襟尚各出或削精
帖括者破硯猶攜抽蠶絲於垂盡短檠未燼發蚓竅於嚮
晨花鳥讐而不親雲霞過而若浼此其一也或溺情佳麗
者笛邀遠步里訪長干菜煮瓢兒漿迎桃葉江山半壁仍
開色界之天脂粉滿湖重撰板橋之記挂玉釵於丁字簾
鉤刻銀甲於沙家絃子此其一也或懷人有夢弔古同騷
邱壑方滋功名如寄則印子古琴又其一也古琴觀察之
孫太史之子扇芬累禩炳采一環以韞璞爲承先以懷鉛
爲繼武少事青箱管華同席昨游白下琨迷聯牀揚石頭

之帆幾回擊楫飲建業之水便欲移家每當塵海甚囂豪
情獨邁狎招鷗鷺含睇薜蘿夕陽未老烏衣之深巷誰家
舊雨不來青溪之落花怨暮十里僦驢一奴挈榼憩通明
吹笙之館過孝侯讀書之臺陋介甫之爭墩羨顧榮之麾
扇班草爲茵畫沙成字沖志旣逸禪悅尤深乃復入我殼
中游汝方外杪櫂合十抱之柯蝴蝶戲五香之草婆訶世
界且閱炎涼震旦神州未離煩惱湘宮瓦墮碎盡鴛鴦金
塔鈴寒誤疑鶉鴿壞牆壓薜圍蕭老之芝龕靈谷摩松拜
志公之肉髻斯則慧業我聞靈妃入道達觀人相才子逃
禪者也或英雄失路豎子成名據龍蟠虎踞之形鑿紙醉
金迷之窟二分明月慣照降旛六代空城迭更貨主乃紅

羊復厄蒼兕旋呼雨花錦石埋孤臣十族之魂燕子春鐙
結南渡小朝之局織兒撞壞家居名士都成畫餅讀下壺
之傳洒淚而過新亭祭金川之碑披髮而出大隧興言及
此慨當以慷於是提琴召侶沽酒命儔一篇鈔出銅盞聲
催四座和成金絲節合落九天之唾澆灌性靈祖十蕩之
胸網羅耳目知帝皇富貴皆甜鄉春夢之婆借兒女妝樓
開下士秋聲之館異日柔奴低唱按羌笛以銷魂廣武重
登擊唾壺而缺口則秣陵樂府祭酒後身秦淮雜詠新城
競爽矣詩若干首同社若干人崑山王椒畦孝廉爲之補
圖余迺誌其緣起云

答劉孟詹啟

袁翼

數千里外閣下時賜一書詢以長安之樂勉以珍攝之方
焚芝者痛蕙愛栝者敬松自非氣類孰喻性情僕所栖靡
牘之屋繩牀穴膝所交跡弛之士席帽壓眉擾擾塵埃惴
惴風雪有家不歸無耦獨往異庶人之在官恥惰士之縞
武如僕輩者奚止數百人乎以後日之海市蜃樓爲入夢
之虎頭金帶捫心茹慙顧影匿笑夫小草雖無遠志大匠
亦有棄材守默爲高馬一鳴而輒斥遭時多蹇龜六鑄而
難成閣下迺忘躍冶之不祥復慮積薪之居上謂相如納
賞可授常侍卜式助縣便作中郎苟倣庾丹負債之豪何
愁左雄限年之格然而灰寒黍谷詎能吹律以召風力屈

鷺雛安得挾山以超海牀頭金盡惟有絕交之書足底路
窮誰是敷食之戶窶人如僕閣下謂爲能之邪少無金張
之交游長負嵇阮之傲骨加以懶似巴蛇憇如寇雉舌本
木強心臆茅塞彼炙輶之才懸河之辯懷刺盈袖傾蓋滿
衢武安門下籍福爲私人奇章幕中杜牧作記室抑之則
眾煦漂山揚之則枯枿塗腹兔窟藉以鄉導闖者利其銅
臭折簡速賓亦有稱觴之士搖筆作頌惟索諛墓之金不
才如僕閣下謂爲能之邪念與閣下卜宅海隅題襟淞上
翔鵠之羽契此壯懷隻雞之局伸乎歡讌穿山聯騎月窺
許遠之祠滬瀆揚帆潮打袁松之壘謂天下英雄惟使君
之與操指腹中空洞容卿輩之多人公眞古之遺狂我是

醉而譖語前塵影事眇已十年矣今則遠道擔簦行吟采
葛春鷓秋蟀義望隨之推移薊北江南山川繚以閒阻近
聞訥夫父子及仙洲胡丈古香嚴丈等皆化爲異物音耗
乍傳咤僚彌日孝章不永其年秣陵重有斯難年未四十
時懷山陽聞笛之悲中散絕絃之恨何可言邪僕衰親垂
白病婦持家計吏與偕暫脫里門之匏繫告身待給尙遲
宦牒之瓜期異日千石可邀五特能蓄買田陽羨飲水建
康復得與君葵笠蕉衫稜鞵布韞花爲四壁重浮蚱蜢之
舟人弔六朝痛飲蒲萄之酒君唱僕詞僕歌君曲優哉游
哉聊以卒歲亦始願不及此也頓首裁牋請盟息壤良時
努力不盡區區

海紅華館文鈔序

董兆熊

道光辛卯瘦山鄭先生歸自山左兆熊造謁于海紅華館先生見而頷之曰子我輩人也吾恨得子晚矣昌黎束帶以見中郎倒屣而迎齒厠賓末坐居客右爾後先生歲或歸望兆熊不爲翕翕熱不爲屑屑往而先生則終始相契也乙未冬先生復自杭歸命之曰吾詩詞十有餘卷頻迦郭丈序錄旣粹以行矣外雜文數十篇楊縮非知己不見李華實精思而成子可與言者合爲我撰次之兆熊再辭不獲三歎以興綜其生平而序之曰先生之文汗瀾卓踔潰淪隱鱗少年氣象崢嶸瑰偉九日照爍射而落之太華巉削踏而離之赤峴神驤白雲孤飛幽龍出泉鬪麟走壘

開闔機關破碎陳敵偏而視之吁可愕也中年以往遘時
多故徘徊去就纏綿死生顛頓婉篤拂鬱侘傺嗚咽流水
慘淒瘳日病鴟干叫哀蟻三聲叩心霜飛搏掌葉殞非古
之傷心人何以能此也老境冲夷卒造平澹遠游歸舍老
氓力田若市不欺憧憧往來如國大治嬉嬉人民驚波怒
濤流成江湖單椒細岑削爲原陸理以爲幹學本有用薰
薰熙熙不知其故至此而變化極矣而兆熊于先生竊有
感焉先生才氣無雙時命不偶陳安操矛十決十盪卞和
抱玉再獻再刖出門西笑年年望日逐水東下時時阻風
黃金之版白玉之牒視不踰咫而不能與鏤刻之選又可
悲矣而先生冷官似瓶過年等羽帶索而游發篋以讀泉

雖伏而脈清草不出而志遠天之和也先生得之春之盎也先生以之兆熊褊識曾何足以測先生哉敬承讎校之役遂不敢以構昧寡學辭直據己見輒僭爲序步舒愚下莫窺魯相彥黃周旋不誣衛尉云爾

舒藝室詩序

董兆熊

雲間詩派振藻楚蘭馳情漢珮衣六銖而乘月機九張而
織雲鼉采玢斑春華舊絢胎息二俊膚浸六朝意搖體骨
辭動魂識故步兵高逸小史致其流連黃門方雅豔婦形
諸歌詠普爲甄錄略可臚陳汎濫勝朝樽總

昭代沿波討源含宮嚼徵夢召彩雀懷握靈蛇蔚乎挺此
翹材鬱然成其文棟且夫詩之言持主張乎風化詩以見
志涵泳其性情開金石感鬼神銘刻山川沐浴日月萬里
而遙有如對面百世之下猶爲動心其思深其力繼恢恢
有餘永永無極使惟絺章繪句鍊月鍛旬已誇鼎之舉其
龍文卽謂劍之衝乎牛斗近是非是其然豈然雖世目之

見推亦余心所不概及讀嘯山張君之詩瀏然以清戛然
以長不探蔡邕之異書不學揚雄之奇字氣彌互于宙合
意牢籠乎區方勃念官邪抗誦春陵之作歎傷時變默存
梁父之吟雖坐席三經陳書一篋而談笑常聞嘯歌不廢
則沖襟可挹頤步卽幾于千里雅詠所被攄辭自安于六
義滿被舊俗導引新機非君而誰也方今泰運豐亨師行
震懼黑山青犢之眾輒肆蠡屯黃巾白騎之羣敢逞螳拒
君筆下成章詩出爲史弭盜可示諸掌擊賊非徒以口乃
夙抱智略甘同隱淪康成旣謝生徒草苗書帶表聖不事
官職管憑松枝鄉人依以爲居邑里藉之引重居有暇日
學不曠功苟助精審音律樂詳推步三五然後知君實通

才詩猶餘事也若僕者儒真一孔文非七依因出門而論
交乃升堂而結分放意所好開心見誠造殷深源談食常
至冷與沈休文坐時不覺移辱示篇章謬加評隲才優于
天下湖海氣豪品絕于人中椒蘭馨逸言超言表而言立
詩在詩外而詩成若夫鍾儀之操土風夏統之唱小海豈
足爲君道哉

太華峯頭作重九圖序

董兆熊

嶽嶷屹嶻嶭岿嶷嶙垂半霄之雲積萬古之雪呼吸通于
帝座峻嶒聳似天門其惟古之太華乎又況白藏氣斂素
節寒至露凝絕頂蓮花凍而不開風吼長林松脂淪而未
化清霜上鬢涼颺襲裾自非挾王喬飛鳧之舉茅盈騎鶴
之術鮮不惛眩徘徊裹足躑躅者也汪君彥石詩攜問天
之句人抱餐霞之心壓泰山于一拳視神州爲點墨揮斥
八極變動六虛溷迹東吳希蹤西華駕車箱而入谷攀鐵
鎖以登塗咸原秋草眺寢殿于漢家嶽廟斜暉想禪儀于
唐代二陵風雨橫眼底以平看四塞關河入掌中而坐見
不負重陽之節斯爲一世之豪邪麻子美登臺餘旅舍之

身嗤點淵明送酒遲州家之使高擎一柱危凌九蒼飄飄然廓廓然欲界之夫已造清都之府矣而或者謂彥石怡神家弄匿影邱樊目未覩峯巒之峯足未履谿谷之境車無飛軼躋鮮鹿盧宗少文身歷千巖徒爲臥對向子平胸蟠五嶽猶待後游而乃行詫趨趨足誇躡躅攀繩挽葛若登青柯之坪握繡升梯如經黃卷之坂誰邀勝侶共濟勝情疇作佳賓竟稱佳設不爲確論固多大言曼都詐飲斗漿杵臼妄求海棗齊諧諾臯之記荒唐謬悠之詞誰爲爲之孰令聽之而不知子虛本誕亥步非真孫興公台嶺神馳舒文遙賦李太白鏡湖飛度挾藻夢游精思近幻冥控通乎松梁何遙舉武可至仙門在望交睫卽來梯颯颯

當之以薜衣磴蘚漸洳踐之以鞞角追倒景步懸崖尋巨
靈之蹟酌太上之泉列宿桂林白茫茫以招我晴穹垂野
青蕩蕩其偏人轉笑坡翁有其詩而無其事也僕好遠游
近尤浪迹願因佳節同陟名區不愁阻興憑作霧于張公
何至發狂效投書于韓子

瞿忠宣公臨桂郡侯行軍章記

董兆熊

干桑萬海之身十羊九牧之局鬯驚震器紐絕坤維陰明
牖納旣社北而殷亡炎靈馭奔非日南之漢舊然猶軍分
兩廣卒調伍符卓立大將之旗倒用司農之印江陵國建
攀援無黑獺之資壽陽兵來殲除應白馬之讖尸臣盡瘁
勇士喪元雖人謀之不臧亦天亡之已見昔在有明之季
永明監國肇慶作都從亡非無子推易位亦有丑父孟亭
改號蕭銑遂僭于蒼梧昇元紀年李昇自立于白下然而
君非獨斷政出多門一龍猶鱗甲未成五虎實爪牙可畏
內官柄用十常侍蔽主爭權客將效忠九節度出師失律
迨至晉王憂死緬國釁生機宜自此去矣危亡自此成矣

惟時瞿忠宣公一柱擎天隻手障日繫麻鞵以朝行在覆
金甌而作相臣令行霹靂火符飛八桂之林政速楓飄露
布勒七星之石舉瓊書疾磨盾墨濃半壁遮欄孤忠奮厲
而何以正人削逐七疏留中健卒飛揚兩軍闔外簷間瓦
墮祝魏宮之夢妖案上鐙飄流蜀井之冷燄吟成浩氣金
印非繫肘之時律吹死聲玉璽乃折角之日握拳爪透卞
侯空憤于遺塋跣足髮披蕭帝徒勞于下殿嗟乎武空山
卓趙家之宮殿猶存房陵仗來柴氏之子孫安在胡銓疏
激小朝廷求活何人葛亮碑荒僞天子出亡有兆殘山賸
水零雨奇風揮古涕以弔鴻蒙綴新文而悲龍漢而斯印
者泥沙汨沒苔蘚玢斑逃劫紅羊旌信白水篆做漢家龜

紐螭紐之異用牌如宋制紅字青字之同符值遇物之能
銘遂徵詩以紀實吾家硯農徵君書精叔重集甚歐陽惘
蹈海之孤臣重臨江之節士狀段太尉之逸事聞者動心
表顏平原之戰功凜然生氣字摹一紙唱徧萬家攷軍門
上客之姓名傳澤國遺民之蹤蹟過蒙誣諉俾證源流摩
挲而一日加三比並則千秋無兩華鐫石墨普天共仰其
晶輝汁灑金壺滿地盡成爲篆籀

國朝駢體正宗續編卷四

受業高安鄒凌瀚校